

【鬧熱个落雨天】曾菁怡原作

鬧鐘仔鈴、鈴、鈴¹響哩！大嫲聲喊佢遽遽趺床，再過忍床就會赴毋掣去學校讀書哩²。佢目西西仔伸手去掀忒鬧鐘，又過橫落眠床，捨毋得摺佢分開。欸！毋係天光咁？外背仰會還係暗摸腎疏？探頭看往出，原來係天公派烏雲來通知佢兜——愛落雨哩！

有人認為落雨天係麻煩天，出外愛著水衣仔，無就擎遮仔，一無細義衫褲又會涿到濕漉漉仔，愛去哪仔都毋方便。學生仔盡惱無法度出去打球仔、搞寮，一下課就會分先生掌等，麼人都做毋得出去涿雨，故所見看啊著落雨，大家就唉唉唧唧，眼盯盯仔看等雨水號等歸隻个運動坪，實在還慍悴哦！

毋過，落雨天對佢來講顛倒係異鬧熱个日仔。朝晨頭一出門，滿街路都係淅淅个車仔，這片嘩嘩、該位叭叭，像久見个朋友相借問樣仔，大家相賽尖共下講起恁久無看著个思念。該兜行路个人，擎等一支支个遮仔花，分雨水淋啊過，跔等就開出各色个花彩，揜去揜轉像在該比看麼人个花較靚樣仔。你係同佢聽較

真兜仔，該雨水打在車仔頂、屋頂、水窟仔還過樹葉仔頂高个聲，全部都無共樣，有高音、有低音，有大聲、有細聲，像係在該唱歌仔分你聽樣仔。成時，雷公還會用曠燼來打燈光，用響雷公來和聲，恁樣講起來，係毋係異生趣？

佢盡好在落雨天打早就去學校，因為該兜平常時固核核个蠅螺仔²、蟻公全部都會趟出來搞水。學校个圖牆³係紅毛泥作个，壁頂生个溜苔青里里仔，落雨該下，蠅螺仔趟上趟下陣打陣，相賽看麼儕蹶較遽，有个彎來幹起做起畫圖个藝術家，有个停跔在圖牆頂高享受分雨涿个清涼、逍遙、還過自在。

落雨天出來搞寮个蟻公盡好膽，衫褲無著就緊拚拚仔走出來搞水，溝壩肚朗朗滾个水流緊沖等來佢也毋驚。有幾下尾蟻公分水沖啊去還會搖來擺去，暢到奈毋得。有个蟻公大擎擎仔趟到路項來，較砸身个還做得趟轉去；較嫗个將就橫在路徑頭，分天公做主哩！

鬧熱个落雨天，有人懊惱，有人歡喜，天公無法度合每一儕人个意，佢就愛自家改變想法，不管麼个天都係盡好个天。

¹ 鈴：音 liang；擬聲詞。模擬鈴聲。

² 蠅螺仔：音 seˋ loˋ eˋ；蝸牛。

³ 圖牆：音 tuˋ xiongˋ；圍牆。

【阿姆个鹹糜】黃旭霞原作

起屋个師傅還過做小工个叔姆在禾埕項無閒泊杈。師傅交代叔姆愛摺磚仔淋濕來起屋時正好用，阿姆看叔姆無閒在該攪沙仔，走去牽水管仔來淋磚仔，佢就跔等阿姆在旁脣搞水。

阿爸在外地上班無法度輒輒轉屋下，屋下大細項个事情全部係阿姆一儕人揸起來做到兩頭烏，佢俚毋知頭天个三姊妹，想著會有新屋好歇、有自家个間房好戴，心肝肚不時都固有歡喜个心情。成時阿姆喊來搵手搬磚仔、疊磚仔、攞水、攞茶……，佢摺兩個阿哥定著會去搵手！

下晝兩點空仔，阿姆在灶下無閒，耳公聽著阿姆拿菜刀切豬肉、香菇、芹菜，洗鑊頭、開瓦斯……，哇！阿姆愛開始煮點心哩！佢恬恬仔去灶下看阿姆煮點心。阿姆對豬油盅仔挖兜仔豬油放落鑊肚，續等放浸過个蝦米、香菇來敲香，炒出香味過後放切好个竹筍，炒一下仔，正放洗淨个米共下過炒，浸過蝦米同香菇个水也無打爽，滴兜仔豆油後就同滾水共下倒落去煲糜哩！差毋多半點零鐘邊仔糜就煲好咗，毋過糜燒燒仔，阿姆就同歸鑊

仔个糜沾¹在大面盆裡肚，分糜莫恁燒。

「阿霞！搵手撿碗筷，放到禾埕个矮桌仔項。」

聽著阿姆喊，佢遽遽排好碗筷，阿姆就喊佢三姊妹入去旁脣个矮屋肚搞。阿姆講：「師傅食點心，細人仔毋好坐在脣頭看人食，恁樣無禮貌。」行入矮屋肚佢就拿細凳頭仔來墊腳，對細窗門仔偷看師傅佢兜食點心，老師傅添第三碗，做小工个叔姆也添第二碗，佢心肝肚當緊張，肚屎咕嚕咕嚕个聲也毋會輸人。阿姆煲到恁大鑊个鹹糜就會無咧！吾个嘴，毋知幾時嘎翹到半天高。

佢遽遽走去灶下，該央時阿姆去收該伸無兩碗个鹹糜咗，阿姆喊佢去搵手收碗筷，佢毋甘願，慢慢仔行、慢慢仔做，碗筷放在灶下就愛走咧！阿姆講：「去拿碗來裝。」原來，阿姆煲好鹹糜，早就有留兜仔分三個細人仔咗。

佢遽遽拿碗去裝糜，這下就顧毋得該下發關个面子咧！鼻公摺嘴愛開始無閒哩啲！

一碗好食个鹹糜，有香菇、蝦米、竹筍、靚豬肉、芹菜，還過阿姆惜子女个心。還細時節佢食毋多出來，這下佢自家做阿姆咧，特別感受得著這一碗鹹糜个好味緒！

¹ 沾：音 dem'；把物品微微浸泡於水面。